

RANDAI
PUTI NILAM SARI

Oleh: WISRAN HADI

(berdasarkan cerita rakyat/kaba PUTI NILAM SARI)

Pendukung randai:

1. Puti Nilam Sari (anak perempuan Rajo Tuo)
2. Puti Linduang Bulan (istri Rajo Tuo)
3. Rajo Tuo (Ketua kampung)
4. Bujang Salamaik (orang suruhan Rajo Tuo)
5. Ameh Dunia (pemuda yang datang membangun kampung)
6. Rang Paladang (petani)
7. Sutan Parapati (yang meminang Puti Nilam Sari)
8. Sutan Parandangan (yang juga meminang Puti Nilam Sari)
9. Manti (juru bicara kampung)
10. Guru (guru tempat Ameh Dunia menuntut ilmu)
11. Urang kampung (orang kampung)
12. Pemusik/penyanyi

*

RANDAI: I

Dandayu pucuak si dandayu
Di rantiang hingkok buruang nuri
Dijapuik kaba rang dahulu
Kaba banamo Nilam Sari

Tasabuik dalam curito lamo
Etan di ranah Taluak Budi
Di lingkuang bukik Kiro-kiro
Disungkuik langik Bakiasan

Rajo nan sadang di surambi
Bakato bakeh Linduang Bulan
Mandeh dek Puti Nilam Sari
Urang nan arif jo budiman

*

RAJO TUO:

Manolah adiak Puti Linduang Bulan
Lah lamo denai bamanuang
Adok kadiri anak kito
Nan banamo Puti Nilam Sari
Lah gadih gadang tu nyo kini
Lah tamaik pulo sakola guru
Baa manuruik pikiran adiak

PUTI LINDUANG BULAN:

Kok tantangan Puti Nilam Sari
Inyo lah gadiah mudo matah
Lah lansia jakun nan bujang bujang
Namun samantang pun baitu

Apokoh lai urang ka junjungannyo
Curitokanlah pado denai
Nak sanang dalam kiro-kiro
Nak sajuak dalam hati

RAJO TUO:

Jikok itu nan adiak tanyokan
Iyo alun lai ado nan ka tampak
Tapi adiak usah risau bana
Kutiko ameh lai di dulang
Kito imbau malah nan patuik
Diundang Rajo jo Panghulu
Dalam galanggang kito mamatuik

PUTI LINDUANG BULAN:

Iyo baitu adaik urang babanso
Di galanggang manantu dipatuik
Di mato rang banyak dipalegakan
Elok lah dipanggia Bujang Salamaik
Buliah basugiro inyo bakameh
Mamancang galanggang Nilam Sari

RAJO TUO:

(Mangecek surang)
Baa pulo kecek den ka carai
Dapek bini nan sabana elok

PUTI LINDUANG BULAN :

Baa tuanku mangecek surang
Sarupo urang barasian

RAJO TUO:

Indak ... indak ...
Di manyo Bujang Salamaik

PUTI LINDUANG BULAN :

O, Bujang salamaik nan tuan tanyokan

Bialah ambo pai maimbaunyo .

Mungkin paja tu sedang balimau

(Berjalan berkeliling memanggil-manggil nama Bujang Salamaik).

*

RANDAI: II

(Gerakan randai, tak ado lagu)

*

BUJANG SALAMAIK :

Manolah tuanku Rajo Tuo
Ampun baribu kali ampun
Jikok dibuang ambo jauh
Jikok digantuang ambo tinggi

RAJO TUO:

Usah lah buyuang mamendo juo
Alah sarupo iko pandangan
Alah sapakaik kami baduo
Nak mamancang galanggang

BUJANG SALAMAIK:

Pucuak dicinto ulam tibo
Bilo mukasuik tuanku ka di pancang

RAJO TUO:

Jumaaik ka ampek aguang babuni
Disinan galanggang kito mulai
Layangkan malah surek ka Rajo rajo
Panghulu, Manti jo Juaro jaan sampai lupu

BUJANG SALAMAIK:

Jikok itu nan kandak Tuanku
Indak kasarik bana tudoh
Asa lai jariah manantang buliah

RAJO TUO:

Eii, Buyuang Bujang Salamaik
Alun manggarik muncuang waang lai
Lah jaleh dek aden apo nan waang mukasuik
(MANGECEK SURANG)
Paja ko indak bakarunciangan
Alun manga manga lai lah mamintak pitih

BUJANG SALAMAIAK:

Ampun ambo dek tuanku
Manga tuanku mangecek surang
Sarupo urang barasian

RAJO TUO :

Aden sedang mambaco manto
Supayo waang masuak sarugo

BUJANG SALAMAIAK :

Kok itu nan tuan doakan
Iyolah sanang kiro kiro

RAJO TUO:

Barangkek lah lai ! Imbau Manti jo Panghulu !
Gua tabuah larangan !
Supayo barapek kasadonyo !
Untuak mambantuak panitia galanggang
Aden jadi katua, aden jadi bandahara !

BUJANG SALAMAIAK:

Baa caro tu bana tuanku

RAJO TUO:

Pitih kan dari saku den!
Alah ka jaleh dek waang

(Mangecek surang)

Paja pandie ! Indak tau jo atasannyo!

*

RANDAI: III

Baraliah kaba hanyo lai
Kabakeh Sutan yo do oi, Ameh Dunia
Urang mudo sadang ka ka en
Samo mamelok yo do oi, tali banda

Sutan nan pandai mambao diri
Nan mudo sayang yo do oi, nan tuo cinto
Dari surau sampai ka lapau
Inyo nan indak yo do io, cacek celonyo

Hari nan sadang tengah hari
Rang paladang yo do oi, duduak tarangah
Sutan datang jo elok budi
Mambao pupuak yo do oi, nan jo caramah

*

RANG PALADANG :

Ondeh rang mudo nan datang nangko
Bapayah bana manolong denai
Jo apo jaso ka dibaleh

AMEH DUNIA :

Kok itu nan mamak sabuik
Elok mamintak pado tuhan

RANG PALADANG:

Lah ijau ladang kasadonyo
Lah bagayuik taruang jo mantimun
Kok tali banda lah elok pulo

Dek jaso sutan kasadonyo

AMEH DUNIA :

Apo nan alah dikarajokan
Bapangka jo paretongan
Nan paralu kito pikiakan lai
Iyolah mambuek koperasi
Disinan kito dapek salang tenggang
Disinan manabuang pitih jo padi
Baa manuruik pandapek mamak

RANG PALADANG :

Jikok itu nan kadisabuik
Tantu suko urang di kampuang
Namun samantang pun baitu
Elok lah baiyo jo Rajo Tuo
Urang bakuaso di nagari ko
Jikok Rajo Tuo lai satuju
Indak kasarik bana dek inyo doh
Elok lah kito pai basamo
Ka rumah Tuanku Rajo Tuo
(*Kaduonyo pai ka rumah Rajo Tuo*)

*

RANDAI: IV

Lah bajalan Sutan Ameh Dunia
Baduo jo urang nan Paladang
Jalan bagageh dek takaja
Cameh mukasuik tak kasampai

Dek lamo lambek nyo di jalan
Tibo di rumah Rajo Tuo
Tampak lah puti tengah laman
Sinan bakucak iman di dado

Tantangan Puti Nilam Sari
Dipelok sanggua jo salendang
Galak bagumam nyo tu kini
Mancaliak urang mudo datang

*

AMEH DUNIA :
Assala'mualaikum

NILAM SARI :
Alaikum salam
Ondeh tuan nan baduo
Apo mukasuik datang kamari
Apo karajo nan alun salasai

AMEH DUNIA :
Kami nak batamu jo Tuanku Rajo
Jikok tuanku lai bakalapangan
Kami nan baiyo duo jo tigo

Lai ko buliah nak bak kian

NILAM SARI :

Jikok itu mukasuik tuan
Elok lah ambo pai kadalam
Maimbau bapak kanduang denai
Manunggu malah tuan disiko
(*Pai ka lua*)

RANG PALADANG :

Iyo kamek paja tu

AMEH DUNIA :

Jo sia mamak mangecek

RANG PALADANG :

E, indak. Mangecek surang sajo
Paja tu sabana jombang
Baa manuruik pandapek sutan

AMEH DUNIA :

Nilam Sari gadih di anjuang
Denai nan anak dagang lalu

RAJO TUO:

(*Tibo*)

Lah panek rang mudo dek manantikan
Apo mukasuik datang kamari

AMEH DUNIA :

Ado nan taniaik dalam hati
Nak mambuek koperasi
Tampek rang kampuang basalang tenggang
Tampek manabuang pitih jo padi

Urang di kampuang lah basadio
Baa manuruik pandapek tuanku

RAJO TUO :

(Mangecek surang)

Koperasi tu bahaso aa tu

RANG PALADANG :

Baa tuanku mangecek surang

Lai ko jaleh apo buah kecek Ameh Dunia

RAJO TUO:

Apo nan dikatokan Sutan ko jaleh bana di den
Kan ka mambuek koperasi, iyo baitu?

AMEH DUNIA :

Apokoh Tuanku lai satuju

RAJO TUO:

Lai ko jaleh kagunonyo dek rang kampuang
Jan Sutan sampai tadorong
Malu Sutan beko bakeh rang rami

AMEH DUNIA :

Kok gunonyo alah jaleh
Tingga dek tuanku lai

RAJO TUO :

Aden sangaik paham tantang ..
Apo tadi?

AMEH DUNIA :

Koperasi.

RAJO TUO:

Yo, yo, itu. Paham den
Tapi manuruik pandapek den
Eloklah nantik kito rapekkan
Sasudah galanggang usai
Sasudah Nilam Sari dapek jodoh nyo

AMEH DUNIA :

Jadi tuanku ka mamancang galanggang?

RAJO TUO:

Jadi Sutan alun tau lai

AMEH DUNIA :

Alun lai Tuanku

RAJO TUO:

(Tarabo) Bujang Salamaik !
Kamari waang !
(Bujang Salamaik datang katakutan)
Indak waang kecekkan ka sutan ko
bahaso galanggang ka dimulai !
Manga sajo karajo waang
(Nak ka manampa Bujang Salamaik)

AMEH DUNIA :

Usah tuanku bamain tangan
Kabau nan dapek di lacuik
Urang tantu mangarati jo kato

RAJO TUO :

Paja ko katurunan kabau !
Pai ang ! Sorakan ka saluruah kampuang
Bao aguang.

Kecek an galanggang ka di pancang
Lai jaleh !

BUJANG SALAMAIK :

Jaleh Tuanku..., jaleh
(*Pai bagageh, talendo dek nyo
Urang Paladang*)

RANG PALADANG :

Baato buyuang

RAJO TUO:

Tu nyo kalakuan anak-anak mudo
Indak baradaik. Indak bataratik
Malendo nan tuo, indak mangarati jo kato

AMEH DUNIA :

Dek takuik tu mah Tuanku.

*

RANDAI: V

Tantangan Puti si Nilam Sari
Sajak batamu lai kanduang, jo Ameh Dunia
Talago biru
Darah badampuang patang pagi
Mato tak lalok lai kanduang, hati babega
Talago biru

Cinto lah laruik di dalam hati
Batapuak kini yo kanduang, sabalah tangan
Talago Biru
Kuruih badannyo si Nilam Sari
Siang dimabuak yo kanduang, si angan angan
Talago Biru

Tantangan Puti si Linduang Bulan
Badatak hati labiah lai kanduang, labiah jo tanuang
Talago Biru
Anak mamaram si buah rindu
Si Nilam Sari lai kanduang, dipanggie datang
Talago Biru

*

LINDUANG BULAN :

Anak kanduang Puti Nilam Sari
Manga kok anak bamanuang sajo

NILAM SARI :

Kok denai duduak bamanuang surang
Mangana untuang jo parasaan

LINDUANG BULAN :

Lah takilek lah takalam tumah nak oi ..
Usah manyuruak di lalang sahalai

NILAM SARI :

Ondeh mandeh janyo denai
Usah itu nan mandeh sabuik
Sarupo denai indak bapangaja

LINDUANG BULAN :

Eloklah mandeh maagiah tahu
Baa pi'ie parangai dek puti puti
Jikoklah rami urang di galanggang
Anak maliek dari anjuang
Tiliak pareso urang dek anak
Jikok ado anak rajo rajo
Nan bakanaan di hati, nan katuju dimato
Usah anak mambuang dadiah
Kabakan sajo ka bakeh mandeh
Bisiakkan sajo bakeh bapak
Buliah nyo pai basugiro
Maminang anak rajo tu

NILAM SARI :

Pitaruah mandeh ambo turuik
Alah ka sanang hati mandeh
(*Mangecek surang*)
Baa aka lai ...
Cinto den alah taroroh

LINDUANG BULAN :

Apo nan anak sabuik sabantako?

NILAM SARI :

Denai ma apa kaji

Umanaik jo pitaruah mandeh kanduang

LINDUANG BULAN :

Iyo baitu anak gadih

Lanca kaji dek di ulang

Pasa jalan dek di tampuah

NILAM SARI :

(Mangecek surang)

Lah abih gali dek galitiak, baa lai

LINDUANG BULAN :

Anak kanduang janyo denai

Elok malah kito ka biliak

Bia diuruik kapalo anak

(Kaduonyo pai bairingan)

*

RANDAI: VI

Lah sampai maso kutiko itu
Tagak marawa tigo rono - tigo rono
Bakulik alang di tengah hari
Galanggang rami di tengah koto – di tengah koto

Bapangiriang Rajo nan datang
Saluak batungkek Panghulu tibo – pangulu tibo
Juaro mangapik si ayam jantan
Siriah balega di carano – di carano

Rami lah urang alang ka palang
Sakodi lapiak alah dikambang – alah dikambang
Ado nan duduak ateh tunggua
Adoh nan tagak ditapi sumua – ditapi sumua

*

Dibuka dengan persembahan Silat dan tari piting.

BUJANG SALAMAİK :

Hai sagalo urang nan barado digalanggangko
Danga dek kito nan basamo
Nan tagak sabalah kida
Adolah Sutan Parapati jo rombongannyo
Datang ka galanggang Nilam Sari
Jikok ado kito nan bakandak
Nak bataruah baketek ketek
Sutan Parapati pantang manulak

Nan tagak sabalah suok
Adolah Sutan Parandangan
Jikok ado nan basalero
Barambuang jo basipak rago
Sipak takrau namonyo kini
Sutan Parandangan indak mamantang
Taruah ditampin ketek gadang

(Bjalan bakaliliang di tengah orang banyak)
Aaa ... apo main ko. Ambuang? Dadu?
Koa? Yoker? Boiling? Golof?

URANG BANYAK :

Ambuang. Ambuang.
(Orang-orang mulai bamain)

BUJANG SALAMAIAK :

(Mandakeki Ameh Dunia)
E, Sutan. Sato pulo Sutan mah.

AMEH DUNIA :

Mancaliak sajo nyo mak

BUJANG SALAMAIAK :

Sapandia pandia parewa musti sato sakaki
Kan iyo baitu ndak?

AMEH DUNIA :

Ambo baru masuk sakaliko ka galanggang
sarupo iko, mak Bujang

SUTAN PARANDANGAN :

Paja dari ma tu.

BUJANG SALAMAİK :

Mahasiswa ka ka en.

SUTAN PARANDANGAN :

Jan lawan lo lai. Indak bapitih tu doh.

*

RANDAI: VII

Tujuh hari galanggang rami
Rajo datang silih baganti
Parandangan jo Parapati
Mato tapauik ka Nilam Sari

Tantangan dek diri Rajo Tuo
Alah patuik dipandangi
Parandangan ado labiahnyo
Parapati punyo mantagi

Rajo ragu alang kapalang
Pilihan tak dapek dijatuhkan
Nilam di panggie dari ateh anjuang
Suruah mamilih rang di halaman

*

RAJO TUO:

Anak denai Puti Nilam Sari
Lah tujuh hari galanggang rami
Kini tibo giliran anak kandung
Mamilih ciek di antaro duo
Antaro Parapati jo Parandangan
Surang kiramaik, surang batuah
Dek karano anak kandung ka mamakai
Elok lah anak nan manantukan
Siapo urang nan kajunjuangan

NILAM SARI :

Ampun dek bapak badan diri
Lah tujuh hari galanggang rami

Denai talalai mamparatikan
Dek karano nan datang silihah baganti

RAJO TUO:

Ha, ganjia bana tadanganyo
Dek karano nan datang silihah baganti?
Indak ko nyo tahu bahaso Sutan
Parapatiah jo Sutan Parandangan
Tapauik matonyo dianjuang nantun
Mancaliak Puti Nilam Sari

NILAM SARI :

Kok tapauik bana mato laki laki tu
Ka bakeh diri denai
Di manyo tapauik hati urang tu?
Alun tantu di hati Nilam Sari

RAJO TUO:

Bijak kau kini
Kini baitu malah dek anak
Bia den tutuik galanggang nangko
Bia nak malu tibo di bapak kau ko!

NILAM SARI :

Manga bapak sarupo tu bana
Talalai anak dek parintang
Manga dek bapak lakeh berang

RAJO TUO:

Takilek ikan di aie
Lah jaleh di den jantan batinonyo

Bujang Salamaik! Kamari waang lakeh!
(*Bujang Salamaik datang bagageh*)

BUJANG SALAMAIAK :

Ampun lah ambo dek tuanku
Ampun baribu kali ampun
Jikok di buang ambo

RAJO TUO:

Ampun ka ampun juo lai
Alah jaleh diwaang aden sadang tarabo
Kini baitu!
Pai capek ka tengah galanggang
Katokan ka urang banyak
Bahaso galanggang ka ditutuik

BUJANG SALAMAIAK :

Baa mangko baitu, tuanku
Balimpik limpik anak Rajo tibo
Basasak sasak juaro datang

RAJO TUO:

Rugi den! Indak ado surang juo
Nan katuju dek anak den nan rancak ko doh
Labiah katuju dek inyo urang dagang
Urang nan indak jaleh asa jo usuanyo
Pai waang lakeh ka galanggang!

(Bujang Salamaik pai takaja, Nilam Sari manangih, Rajo Tuo mahantam tanah)

NILAM SARI :

(Maratok)

Anak urang di koto Padang
Naiak kureta ka Bukik Tinggi

Mandeh bangih bapak pun berang
Baa katenggang Nilam Sari

Alah ditimbo banda padang
Biluluak juo nan tatimbo
Alah dicubo nan bak urang
Nan buruak juo nan tibo

RAJO TUO:

Antok! Manangih ka manangih juo baru lai
Kau kiro dunia ko salasai dek aie mato
(*Mangecek surang*)
Kareh kapalo!
Saroman pulo jo bapak nyo!

*

RANDAI: VIII

Galanggang usai maso itu, kanduang lai
Pulang lah urang batanyo tanyo
Baa tarabo bana tuanku, kanduang lai
Makonyo alek nan diuraknyo

Tantangan diri Nilam Sari, kanduang lai
Duduak bamanuang ateh anjuang
Mato tak lalok patang pagi, kanduang lai
Ameh Dunia nan indak datang

*

NILAM SARI :

Ameh Dunia urang nan jombang
Urang dicinto dek urang kampuang
Banyak usaho nan lah jadi
Mambangun kampuang jo halaman
Tapi denai urang buruak
Indak tau mambaleh jaso
Datang karumah bapak tarabo
Mukasuik tak jadi disampaikan
Usah tuan bangih ka bapak denai
Iyo baitu adaik nyo urang tuo
Babana kadiri surang
Indak mangarati jo kandak urang mudo

AMEH DUNIA :

Biaso sajo tu mah Puti
Elok dek awak alun tantu elok dek urang
Tantangan mambuek koperasi
Tapaso mukasuik disuruikkan

NILAM SARI :

Mukasuik tuan sungguah mulie
Tapi bapak nan indak manarimo
Baa katenggang badan ambo

RAJO TUO:

(Tibo-tibo datang)

Oi..., Jangak! Disiko malah kau
Bagurau jo anak bujang ko
Patuik kau indak namuah mamiliah
Anak rajo nan di galanggang
Kini baitu malah dek kau

(Mangecek surang)

Tobat den! Bacewek cewek inyo di siko
Iyolah katinggalan bana den komah

NILAM SARI :

Ondeh bapak kanduang janyo denai
Apo bana nan bapak katokan
Mangecek surang sarupo urang berang

RAJO TUO:

Aden indak berang. Indak bangih
Cuma aden ka mangecek ka bakeh kau

NILAM SARI :

Katokan sajo malah bapak
Supayo sanang dalam hati

RAJO TUO:

Nan ka den kecek kan ! Pulang!
(*Rajo Tuo mairik Nilam Sari kalua*)

AMEH DUNIA :

(*Mangecek surang*)
Lapeh den

(*Sutan Parapati jo Sutan Parandangan datang manamui Ameh
Dunia*)

*

RANDAI : IX

(Tak ado lagu, cuma randai)

SUTAN PARAPATIH :

Sutan nan banamo Ameh Dunia?

AMEH DUNIA :

Iyo

SUTAN PARANDANGAN :

Iyo patuik Nilam Sari kanai hati

AMEH DUNIA :

Baa baitu kato tuanku

SUTAN PARANDANGAN :

Urang nyo gagah tapi tak baradaik

AMEH DUNIA :

Dareh bana tuanku manyubarang

Mahino urang alun bukanalan

Baitu adaik urang di siko!

SUTAN PARAPATIH :

Usah waang mangecek sarupo tu

Kini baitu malah dek waang

Kami baduo datang nak mambuek paretongan

SUTAN PARANDANGAN :

Lah lamo kami paratian

Waang maagah Nilam Sari

Datang ka rumah Rajo Tuo

Mangecek pakaro pambangunan kampuang
Tapi mato ang manjala ka biliak Nilam Sari
(*Mangecek pada Parapatih*)
Jan dilawan badebaik. Inyo pandai tu!
Tojeh sajo kapalonyo

SUTAN PARAPATIH :

Tantu iyo. Tapi sia nan dulu
Kok mati den,
tantu Nilam Sari dapek dek waang

SUTAN PARANDANGAN :

Kok mati den dau
tantu Nilam Sari dapek pulo dek waang

SUTAN PARAPATIH :

Jadi baa.

SUTAN PARANDANGAN :

Rancak basamo samo.

SUTAN PARAPATIH :

Jadi.

SUTAN PARANDANGAN :

Oi, buyuang indak tau diuntuang
Elok barangkek dari kampuang ko
Kok indak namuah waang pai
Alamaik badan waang ka binaso

AMEH DUNIA :

Bulan katibo ambo barangkek

SUTAN PARAPATIH :

Pandai pulo waang minta tangguh

SUTAN PARANDANGAN :

Sia nan manyuruah waang sabulan lai

Nilam Sari? Iyo sabana

Padek dek waang tu mah

AMEH DUNIA :

Jadi baa mukasuik tuan?

SUTAN PARAPATIH :

Pakak waang! Barangkek dari kampuang ko!

AMEH DUNIA :

Indak

SUTAN PARANDANGAN :

Malawan waang?

AMEH DUNIA :

Lawan indak dicari kok basobok....

SUTAN PARAPATIH :

Kok basobok baa?

SUTAN PARANDANGAN :

Ka ang agiah pitih den? Kurang aja!

SUTAN PARAPATIH :

Iko nan ka lamak de waang

SUTAN PARANDANGAN :

Iko nan ka tuju de ang

(Ameh Dunia dipaduoan. Urang tu bacakak. Sutan Parapatih tabunuah, dek pisau Sutan Parandangan)

*

RANDAI: X

Alah lah mati si Parapatiah, yo andam oi
Tabunuah dek pisau parandangan
Urang di kampuang mandi jo tangih, yo andam oi
Ameh Dunia alah tatuduah

Rajo Tuo tambah tarabo, yo andam oi
Ameh Dunia dicarinyo
Nak diusie dari siko, yo andam oi
Dek marusak kampuang jo koto

*

RAJO TUO:

Hai rang kampuang kasadonyo
Caliak lah paja ketek nangko
Antah dari mano asa jo usuanyo
Barani mangaruah kampuang kito

Nan sakarang kini nangko
Sasudah den timbang elok buruak nyo
Ameh Dunia indak buliah lai tingga di siko

RANG PALADANG :

Manuruik pangamatan kami
Nan salah bukan Ameh Dunia
Kami basasi pado Allah

Tantangan diri Ameh Dunia
Lah banyak usahonyo di kampuang kito
Buliah dicaliak apo nan alah dikarajokannyo
Kok Ameh Dunia diusie
Artinyo kito indak pandai mambaleh budi
Susu di baleh jo tubo
Itu nan talarang dalam adat kito

RANG KAMPUANG :

Iyo. Iyo.

MANTI :

Kok asa usua Ameh Dunia nan kadisabuik
Lai ka indak malu awak kasadonyo

RANG KAMPUANG :

Indak indak. Sabuik selah
Indak mambaie bagai doh

MANTI :

Manuruik kaba rang panggaleh
Nan datang dari Tanjuang Medan
Ameh Dunia anak dek Nangkodo Rajo Tungga
Den taruih an ...

RANG KAMPUANG :

Taruih. Taruih

MANTI :

Nan banamo Puti Linduang Bulan
Induak bareh Tuanku Rajo Tuo
Adolah balahan dek Nangkodo Rajo Tungga
Urang baduo badunsanak
Sarupo anak balam
Alah jaleh tu....

RANG KAMPUANG :

Jaleh. Jaleh.

RAJO TUO :

Kalau baitu baritonyo, Ameh Dunia ko....

MANTI :

Anak sudaro dek Linduang Bulan

RAJO TUO :

Abih buah den

MANTI :

Baa pulo kamausie anak mamak dek Nilam
Samo jo marubah tabik mato hari
Iyo baitu ndak?

*

RANDAI: XI

Sajak Rajo di agiah tau, yo tuan oi
Tantangan diri si Ameh Dunia
Lah pindah tampek tingganyo, yo tuan oi
Iyo di rumah Linduang Bulan

Lah mangamek si Nilam Sari, yo tuan oi
Sanang hati bukan kapalang
Alah dapek parintang hati, yo tuan oi
Duduak baduo bapandangan

Tibo maso kutiko itu, yo tuan oi
Handak babaliak pai sikola
Hati barek tinggakan kampuang, yo tuan oi
Ibo bacarai jo adiak kanduang

*

NILAM SARI :

Ondeh tuan denai Ameh Dunia
Lah duo musim talampau
Ampie katibo musim katigo
Manga tuan indak babaliak
Maambiak pangkek jo gala
Sarjana kecek rang kini

AMEH DUNIA :

Adiak kanduang Nilam Sari
Lah lamo denai manuangkan
Lah tibo putusan ka diri denai
Sarjana indak ado artinyo
Kalau tak pandai mambangun kampuang

Lah taniaik di hati denai
Tingga di siko salamonyo
Mambangun kampuang basamo samo

NILAM SARI :

Ganjia bana tadanganyo
Urang mudo nan indak gilo pangkek
Anak sikola nan indak namuah jo gala
Manga barubah pangana tuan

AMEH DUNIA :

Apo guno nyo gala nan santiang
Tapi indak pandai karajo surang
Elok sarupo iko kini
Denai kasawah jo kaladang
Ba taranak ba ketek ketek

NILAM SARI :

Namun samantang pun baitu
Indak ko ado tapikie dek tuan
Nak iduik saroman urang

AMEH DUNIA :

Jikok saroman urang di kota
Karajo kantua sadonyo
Indak namuah ma angkek pangkue
Gilo ka duduak duduak di kantua sajo
Iyo jauh dari kandak hati denai

NILAM SARI :

Mukuik denai hiduik sarupo

AMEH DUNIA :

Usah adiak tatagun mangatokannyo

Rumik bana nan ka disabuik
Jo denai usah adiak sagan sagan
(*Mangecek surang*)
Tasirok darah den ko mah
Apo pulo nan ka dikatokannyo

NILAM SARI :

Tuan nan sarupo bapak denai
Suko mangecek ngecek surang
Sarupo urang nan damam paneh
Apo nan tuan katokan tadi

AMEH DUNIA :

Bak mamang urang tuo tuo
Ati badatak labiah pado tanuang
Itu nan marusuah dalam hati

NILAM SARI :

Denai nan cameh ka diri tuan
Koklah tatap tuan di siko
Baa pulo hati urang nan di tinggakan
Etan di ranah Tanjuang Medan

AMEH DUNIA :

Tantangan diri bapak jo mandeh
Nan tingga di Tanjuang Medan
Indak inyo takuik jo cameh
Malapeh denai pai ka ka en

NILAM SARI :

Maklum urang mudo mudo kini
Di sikola banyak kawan bamain
Ado bujang ado nan gadih
Kok indak marusuah dek nan bujang

Baa hati nyo dek nan gadih
Tantu taibo inyo di tinggakan

AMEH DUNIA :

Kok adiak manulak diri denai
Manjadi urang siko
Katokan sajo taruih tarang
(*Mangecek surang*)
Baru tau den kini
Ruponyo, kumbang ka inggok putiah kaki

NILAM SARI :

Manga tuan bakato sarupo tu bana
Denai rang buruak tak bapunyo
Dima kumbang ka namuah hinggok

RAJO TUO:

(*Tibo*)
Kami lah barundiang jo mandeh si Nilam
Nak mangabek padi jo daunnyo

AMEH DUNIA :

(*Mangecek surang*)
Durian runtuh ko mah

NILAM SARI :

Jikok baitu kato bapak
Tasarah sajo ka uda Ameh Dunia

AMEH DUNIA :

(*Mangecek surang*)
Lah maimbau uda pulo inyo a

Maa talok koo....
Caie den. Caie

RAJO TUO:

Ondeh nak kanduang Ameh Dunia
Tantangan mukasuik kami cako
Baa manuruik pandapek anak

AMEH DUNIA :

Kalau dek urang ka mamakai
Lai namuah manarimo
Apo kadayo badan diri denai

RAJO TUO:

(Mangecek surang)

Rabah juo kabau den limo ikue lai, ko mah
Tapi bialah, anak den kan lai dapek laki.

*

RANDAI: XII

Tipak dek diri la olai, si Nilam Sari
Lah limo anak la olai, nan di gadangkan
Etong kadiri la olai, si Ameh Dunia
Alah manjadi la olai, Sutan Nagari

Padolah maso la olai, kutiko itu
Lah pacah kaba, la olai dek urang banyak
Sampailah pulo, la olai ka bakeh guru
Sutan Nagari la olai, patuik ditiru

Gala sarjana la olai, diagiah guru
Nan dek karano la olai, jaso-jasonyo
Guru bajalan la olai, di maso itu
Iyo ka rumah la olai, si Ameh Dunia

*

GURU :

Manolah urang kampuang nan di siko
Bari luruih denai batanyo
Di mano rumah Ameh Dunia
Nan bagala Sutan Nagari
Samaso dulu inyo basikola
Lah mamilih kampuang tampek tingga
Inyo nan indak namuah di agiah gala
Labiah suko inyo ba karajo
Mambangun kampuang basamo samo
Kini denai datang kamari
Utusan nan dari Tanjung Medan

Utusan dari sikolanyo
Ka ma agiah gala ka bakeh si murik
Gala sarjana ka dipasangkan

RANG PALADANG :

Jikok itu kandak guru
Molah kito pai ka si nan
Iriangkan molah di balakang

(Lah tibo di rumah Ameh Dunia)

RANG PALADANG :

Manolah Puti Nilam Sari
Ikolah guru Sutan Ameh Dunia
Datang dari Tanjuang Medan

NILAM SARI :

Ampunkan ambo dek bapak guru
Mananti molah agak sabanta
Bia di japuik Ameh Dunia
Inyo nan sedang di tengah sawah
Manyerak kan pupuak urea
a... itu nyo tibo
tau di garak malah tuan

AMEH DUNIA :

(Tibo)

Garak tibo bakeh diri denai
Itu sababnyo bagageh pulang
Iko malah nan tajadi
Ondeh guru janyo denai
Bari maaf ambo dek guru
Denai nan indak turuik pangaja
Lah datang guru kamari

Tantu manuntuik kasalahan

GURU :

Denai nan utusan dari Tanjuang Medan
Nak manjapuik anak agak sabanta
Guru gadang jo urang nan bajabatan
Nak ma agiah gala bakeh anak
Dek karano jariah payah salamo nangko
Gala sarjana ka baleh nyo
Urang lah mananti di Tanjuang Medan
Basugiro malah anak manuruik

AMEH DUNIA :

Jikok baitu kato guru
Denai nan indak kamanulak

NILAM SARI :

Tapi kok tuan pai ka sinan
Usah lamo bana tuan di jalan
Cameh urang ditinggakan

RANG PALADANG :

Guru, dek kami sarjana nyo indak paralu doh
Tapi usaho jo karajo nyo
Jan sampai Ameh Dunia di kabek pulo
Di Tanjuang Medan tu, guru

GURU :

Jan cameh bakeh denai
Kalau muriknyo sarupo Ameh Dunia
Guru nyo tantu labiah elok dari itu

RANG PALADANG :

Ragu den, guru.

RANDAI: XIII

Risaulai...

Alah bajalan si Ameh Dunia
Baduo jo bakeh gurunyo
Manuju ranah Tanjuang Medan
Nilam malambai dari pintu, tuan oi
Nilam malambai di balakang, lai ai ai

Risaulai....

Urang kampuang rami maanta
Ragu bacampua gadang hati
Kok ndak babaliak Ameh Dunia
Bak biduak indak ba kamudi, tuan oi
Bak biduak indak bakamudi, lai ai ai

Risaulai...

Oto nan dari Pakan Baru
Handak manjalang kota Padang
Randai sakitu molah dulu
Talempong mairiang di balakang, tuan oi
Talempong mairiang di balakang, lai ai ai

*

**Padang, Juli
1982**

Biodata

WISRAN HADI (HADI kependekan dari nama ayahnya alm. HAJI DARWAS IDRIS, ulama ahli hadist dan Imam Besar Masjid Raya Muhammadiyah Padang) adalah seorang sastrawan/budayawan Indonesia yang banyak menulis karya sastra (novel, cerita pendek, drama, cerita randai dan skenario film), sutradara teater dan film, pembina berbagai kesenian tradisi Minangkabau, wartawan, penulis esei dan artikel. Lahir dan dibesarkan di ranah Minang, Sumatera Barat. Tamat STSI “ASRI” Jogjakarta 1969.

1977 mewakili Indonesia dalam *International Writing Program* (Pertemuan Penulis-penulis Internasional) di Iowa University, Iowa, USA selama 4 bulan.

1978 melakukan observasi teater modern Amerika Serikat di New York.

1987 kembali melakukan observasi teater modern Amerika dan Jepang selama 5 bulan.

1991 dan thn. 2000 mendapat penghargaan sebagai Sastrawan Terbaik Indonesia oleh Departemen Pendidikan dan Kebudayaan Republik Indonesia yang diserahkan Menteri P dan K di Jakarta.

2000 mendapat penghargaan South East Asia Write Award (Hadiah tertinggi untuk Sastrawan ASEAN) dari kerajaan Thailand yang diserahkan Raja Thailand di Bangkok.

2003 mendapat Anugerah Seni dari Pemerintah Indonesia yang diserahkan oleh Menteri Parnasibud atas jasa-jasanya dalam menaikkan marwah seni di dalam dan di luar negeri.

Sejak 2001 sampai 2005 menjadi dosen tamu pada Akademi Seni Kebangsaan, Kementerian Kebudayaan, Kesenian dan Warisan Malaysia di Kuala Lumpur.

2005 menjadi salah seorang panelis dalam Debat Publik bagi semua calon Gubernur Sumatera Barat yang dilaksanakan KPUD Sumatera Barat di TVRI Stasiun Padang.

2005 mendapat penghargaan sebagai Budayawan oleh Pemda Kota Padang yang diserahkan oleh Walikota Padang dalam peringatan hari kemerdekaan RI 17 Agustus 2005.

2005 - sampai sekarang menjadi penulis tetap untuk Lembaran Stres Harian Padang Ekspes.

2006 – sampai sekarang mengasuh rubrik SURAMBI ADAT WISRAN HADI di TVRI Sumatera Barat.

2007 – sampai sekarang menjadi Dewan Pakar ICMI Sumatera Barat.

Buku-buku yang telah terbit.

1. *Tamu* diterbitkan oleh PT Pustaka Utama Grafiti dan mendapat penghargaan Buku Utama dari IKAPI dan Dept. P dan K Jakarta, juga dipilih untuk menjadi buku bacaan pelajar di Indonesia. Sebelumnya diterbitkan secara bersambung pada Harian Umum Republika Jakarta.
2. *Imam* diterbitkan oleh Pustaka Firdaus, Jakarta. Sebelumnya secara bersambung telah diterbitkan Harian Umum Republika Jakarta.
3. *Orang-orang Blanti* diterbitkan oleh Penerbit Citra Budaya, Padang.
4. *Negeri Perempuan* juga diterbitkan oleh Pustaka Firdaus Jakarta.

5. *Dari Tanah Tepi* (kisah perjalanan Haji) diterbitkan oleh Balai Pustaka Jakarta. Sebelumnya secara bersambung telah diterbitkan Harian Singgalang Padang.
6. *Pelarian* diterbitkan secara bersambung pada Harian Republika, Jakarta
7. *Daun-daun Mahoni Gugur Lagi* (kumpulan 22 buah cerpen) diterbitkan oleh Penerbit Fajar Bakti Sdn. Bhd. Malaysia.
8. *Guru Berkepala Tiga* (kumpulan 22 buah cerpen) diterbitkan oleh Balai Pustaka Jakarta.
9. *Puti Bungsu* (Wanita Terakhir) diterbitkan oleh Pustaka Jaya dan Balai Pustaka Jakarta.
10. *Anggun Nan Tongga* diterbitkan Balai Pustaka, Jakarta sampai cetakan VI.
11. *Jalan Lurus* diterbitkan PT Angkasa Bandung. Mendapat Hadiah Sastra 1991 oleh Pusat Pengembangan Bahasa, Dept. P dan K Jakarta. Buku tersebut juga mendapat hadiah sebagai buku drama terbaik pada Pertemuan Sastrawan Nusantara 1997.
12. *Empat Sandiwara Orang Melayu* (kumpulan naskah drama) diterbitkan PT Angkasa Bandung. Mendapat hadiah sebagai buku drama Indonesia terbaik oleh Departemen Pendidikan dan Kebudayaan 2000 dan dipilih pula menjadi buku bacaan pelajar.
13. *Empat Lakon Perang Paderi* (Kumpulan naskah drama tentang Perang Paderi) diterbitkan oleh Angkasa Bandung, pada tahun 2002 difilmkan oleh TVRI Pusat dengan judul PERANG PADARI.
14. *Roh dan Nyonya2* (naskah pemenang naskah sayembara DKJ 2004) diterbitkan dalam Kumpulan Drama *Sobrat* diterbitkan Grasindo Jakarta.
15. *PEMBISIK* diterbitkan dalam kumpulan cerpen terbaik harian Republika, Jakarta.
16. *Haji Amran Sutan Sidi Sulaiman, Pendiri Yayasan Baiturrahmah* – biografi, Padang 2007.

15 karya dramanya adalah pemenang dalam Sayembara Penulisan Naskah Sandiwara Indonesia yang diadakan oleh Dewan Kesenian Jakarta semenjak 1976 s/d. 1985 dan 1998, 2004.

13 karya dramanya yang lain diterbitkan oleh Proyek Pengadaan Buku-buku Sastra Departemen Pendidikan dan Kebudayaan RI Jakarta.

7 karya dramanya telah difilmkan oleh TVRI Palembang, TVRI Padang dan TVRI Jakarta; Empat lakon Perang Paderi, Kau Tunggu Siapa Nilo, Cindra Mata dan Anggun Nan Tongga.

Dia juga menulis naskah randai; *Sabai Nan Aluih, Manih Talonsong, Cindua Mato, Puti Nilam Sari, Umbuik Mudo, Sutan Pamenan, Puti Bungsu, Hari Jadi Padang*, telah dipentaskan oleh grup-grup randai di Padang dan Malaysia.

Tulisan-tulisan lainnya berupa makalah telah banyak dipresentasikan dalam berbagai seminar di Indonesia dan Malaysia. Sedangkan tulisan-tulisan artikel, esei, features, catatan kebudayaan telah dimuat pada berbagai surat kabar dan majalah, di antaranya; Majalah sastra Horison Jakarta, Harian Umum Republika Jakarta,

Harian Kompas Jakarta, Singgalang, Haluan, Mingguan Tribne Sumbar dan Padang Ekspres di Padang.

Selain menulis, dia juga memimpin BUMI TEATER dan telah mementaskan drama-dramanya di Taman Ismail Marzuki dan berbagai kota lainnya dan di Malaysia (Kuala Lumpur dan Johor Bahru).

Pernah menjadi redaktur Harian Singgalang, redaktur majalah kebudayaan Limbago, sekretaris eksekutif dan dosen Akademi Pariwisata Bunda, Direktur Kerohanian pada Ruang Pendidik INS Kayutanam, dosen tamu pada Fakultas Sastra dan Fakultas Pertanian Universitas Andalas serta Universitas Bung Hatta.

Alamat:

Jalan Gelugur Blok H no. 2

Wisma Indah II

Padang 25142

Telp. 0751 7052174

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.